

# 多丽

## (咏白菊)

小楼寒，  
夜长帘幕低垂。  
恨潇潇、无情风雨，  
夜来揉损琼肌。  
也不似、贵妃醉脸，  
也不似、孙寿愁眉。  
韩令偷香，  
徐娘傅粉，  
莫将比拟未新奇，

细看取、屈平陶令，  
风韵正相宜。

微风起，  
清芬酝藉，  
不减酴醾。

渐秋阑，  
雪清玉瘦，  
向人无限依依。  
似愁凝、汉皋解佩，  
似泪洒、纨扇题诗。  
朗月清风，  
浓烟暗雨，

天教憔悴瘦芳姿。  
纵爱惜、不知从此，  
留得几多时。  
人情好，  
何须更忆，  
泽畔东篱。